

## SPECIES ALIQUOT CHRYSIDIDARUM NOVÆ,

ab ALEXANDRO Mocsáry descriptæ.

1. *Cleptes Parnassicus.*

Sexus ab invicem colore capitis thoracisque differunt.

Submagnus, elongatus, sat robustus, capite thoraceque supra parce nigro-, subtus cum abdomine pedibusque albido-pilosis; facie planata medioque usque ad stemma anticum in femina anguste, in mare longitudinaliter non canaliculata; genis sat longis, antennarum articulo secundo longioribus; pronoto convexo, medio longitudinaliter non sulcato, intra marginem posticum serie punctorum transversa bene distincta, dense, sat rugoso-punctato, metanoti disco fortius, mesopleuris subtilius irregulariter rugulosis, dentibus postico-lateralibus validis; femoribus tibiisque posterioribus nigro-æneis, illis anticis externe violascentibus, posterioribus virescentibus, tibiis anticis tarsisque omnibus rufis; alis sordide-hyalinis, venis fuscis, anticis apicem abdominis non attingentibus, tegulis nigropiceis. — Long.  $7\frac{1}{2}$ —8 mm.

Femina: capite, mesonoto, scutello et postscutello igneo-auratis, facie subtus macula magna nigro-ænea; antennis crassiusculis, testaceis, articulis, tertio excepto, præsertim superne fortiter infuscatis, scapo violascenti-æneo; fronte verticeque dense fortius punctatis; pronoto nigro-æneo, disco nitore violascenti; mesonoto et scutello sparsim punctatis, interstitiis latis lævibus; metanoto et pectore cyanescenti-æneis, mesopleuris supra transverse viridi-æneis; dentibus postico-lateralibus apice subtruncato-obtusis; abdomine nitido, segmentis tribus primis rufo-testaceis, tertii margine postico quartoque nigro-piceis; segmento primo dorsali sat sparsim, reliquis densius subtiliter punctulatis.

Mas: capite thoraceque læte-cyaneis parumque violascentibus, orbitis oculorum internis oreque virescentibus; antennis crassiusculis, nigropiceis, scapo virescenti; fronte verticeque densius, sed parum subtilius punctatis, quam in femina; mesonoto sat sparsim, scutello et postscutello dense minus crasse punctatis; metanoto summa basi concinne carinulata, carinulis circiter decem bene distinctis; dentibus postico-lateralibus subacutis, postice recte truncatis; abdomine nitido, segmentis dorsalibus tribus ventralibusque duobus rufo-testaceis, dorsali tertio margine postico anguste maculaque sat magna subquadrata, usque ad initium segmenti

ducta, quarto quintoque nigro-piceis, his duobus ultimis parum violascen-tibus; primo sublævi, tantum microscopice, secundo densius evidentiusque subtiliter, reliquis parum fortius punctulatis.

*Cl. semiaurati* L. et *pallidipedis* LEP. socius; sed maior et multo robustior; femina differt insuper: alis anticis medio et apice fasciatim non fumosis coloreque ex parte; mas: capite supra pronotoque multo fortius punctatis, facie non canaliculata, metanoto summa basi concinne carinu-lata, alis anticis apicem abdominis non attingentibus — sexus iam satis distincti.

Patria: *Graecia* (Mons Parnassus) (Mus. Hung.).

### , 2. **Holopyga** (*Hedychridium*) **hirtipes** BUYSS. i. l.

Parvula, sat robusta, ubique, sed præsertim pedibus parce longius albido-pilosa; tota læte viridi-aurata, abdominis segmentis dorsalibus subtiliter punctulatis cupreo-micantibus, ventralibus nigro-piceis; antennis tenuibus testaceis, inde ab articulo quinto fortius infuscatis, scapo viridi-aurato; fronte lata, dense irregulariter longitudinaliter striata, genis valde brevibus, fere nullis, verticis medio pure aurato, sat sparsim, thorace sat dense subtiliter punctulatis, pronoto valde convexo, dentibus postico-late-ralibus minutis, angulatis; femoribus omnibus viridi-auratis, trochanteri-bus, geniculis, tibiis tarsisque testaceis, tibiis in medio infuscatus parum-que viridi-micantibus; alis hyalinis, venis tegulisque testaceis. — ♀; long. 3 mm.

Species: de colore, hirsutie et præsertim de frontis sculptura, iam facile cognoscitur.

Secundum observationem Cl. Domini Dr<sup>is</sup> O. SCHMIEDEKNECHT est *Pararophitis quadratae* FRIESE parasita.

Patria: *Aegyptus* (Cairo) (Mus. Hung.).

### 3. **Chrysis** (*Holochrysis*) **rubricata** BUYSS. i. l.

Submediocris vel subparva, elongata, sat robusta, parce longius albido-pilosa; æneo-viridis parumque subaurata, mesonoti lobo medio in femina antice tantum, in mare toto violascenti-cyaneo; pronoti margine antico, mesonoti lobis lateralibus, abdominis item segmentis dorsalibus: primo antice, secundo tertioque (præter marginem posticum) læte auratis; segmentis 1—2 margine postico anguste viridibus, tertio basi concaviu-scuto transverse impresso, supra seriem parum calloso, foveolis sat magnis parum sulciformibus, circiter decem viridibus vel violascentibus, margine apicali concolori, arcuato-integro medioque leviter sinuato, summo mar-

gine tenuiter albo-pellucido; segmento primo dense subtiliter coriaceo-ruguloso, secundo tertioque fortius rugosiuscule punctatis; secundo carinula mediana minus distincta; cavitate faciali planiuscula, dense punctato-coriacea, medio leviter canaliculata et utrinque in femina parum, in mare dense argenteo-sericeo pilosa, superne indistincte marginata; ore buccato, genis longis, articulo antennarum tertio in femina æquilongis, in mare longioribus; antennis tenuibus fuscis, cano-puberulis, sat longis, articulis duobus primis viridi-auratis, tertio in femina quarto æquilongo, in mare parum breviore; vertice thoracisque dorso dense subtiliter, scutello postscutelloque parum fortius punctato-reticulatis subcoriaceis; pronoto brevi transverso-rectangulo, antice in medio vix impresso; metanoti dentibus postico-lateralibus sat validis subacutis divaricatis; segmentis ventralibus viridi-subauratis; femoribus tibiisque læte-viridibus, tarsis-fuscis; alis pure-hyalinis, venis fuscis, cellula radiali lanceolata subcompleta, apice vix aperta, tegulis viridibus. — ♂ ♀; long. 4— $5\frac{1}{2}$  mm.

Egregia hæc species *Chrys. hybridae* LEP. parum similis, de colore iam facile cognoscitur.

Patria: *Aegyptus* (Cairo et Assuam, a Dom. Drº O. SCHMIEDEKNECHT in floribus *Zygophylli coccinei* L. collecta) (Mus. Hung.).

#### 4. *Chrysis* (Trichrysis) *cypria*.

Subparva, elongata, sat robusta, parce longius albido-pilosa; læte æneo-viridis parumque subaurata, mesonoti lobo medio, alarum tegulis, abdominis basi segmentisque 2—3 basi violascenti-cyaneis; cavitate faciali profunda, subaurata, medio anguste canaliculata et utrinque dense subtilissime transverse striata, superne indistincte marginata; antennis tenuibus, sat longis, rufescensibus, cano-puberulis, articulis duobus primis viridi-auratis, tertio longitudine mediocri, quarto quintoque simul sumptis breviore, genis brevibus, articulo antennarum secundo vix longioribus; vertice valde convexo, dense subtilius punctato-reticulato; pronoto brevi, transverso, antice in medio fortius impresso subtilius, mesonoto et scutello postscutelloque evidentius punctato-reticulatis; metanoto convexo, dentibus postico-lateralibus sat longis, validis, subacutis, divaricatis; abdominis segmentis dorsalibus: primo basi trifossulato, fossula mediana superne sublævi, subtiliter punctato, secundo carinula mediana minus distincta, tertio convexo, supra seriem leniter calloso transverseque impresso, foveolis minutis orbiculatis numerosis, margine apicali tridentato, dentibus in arcum dispositis sat longis acutis, centrali externis longiore, emarginaturis leniter arcuatis, segmentis 2—3 subtiliter rugosiuscule punctatis; ventre pedibusque læte-viridibus, illo segmento secundo utrinque nigro-maculato, his

tarsis fusco-testaceis; alis albo-hyalinis iridescentibus, venis pallide fuscis, cellula radiali triangulariter lanceolata subcompleta. — ♀; long.  $4\frac{1}{2}$  mm.

Exemplaribus *Chrys. cyaneae* L. similis; sed magis viridis, abdominis segmenti ultimi dentibus longioribus, in arcum dispositis et alis albo-hyalinis, certe distincta est species.

Patria: *Insula Cyprus* (Larnaca) (Mus. Hung.).

### 5. *Chrysis* (Tetrachrysis) *inseriata*.

Mediocris, elongata, minus robusta, parce albido-pilosa; olivascenti æneo-viridis, vertice thoraceque supra et alarum tegulis violascentibus; cavitate faciali angusta, profunda, dense punctato-coriacea, parum viridi-aurata, medio longitudinaliter anguste canaliculata, argenteo-sericeo-pilosa, superne indistincte arcuatim marginata, fronte verticeque latis valde convexis; antennis sat brevibus, crassiusculis, fuscis, cano-puberulis, articulis duobus primis cyaneo-viridibus, tertio brevi, quarto longitudine æquali; genis brevibus, articulo antennarum secundo vix longioribus; vertice densius parumque subtilius, thorace supra fere æqualiter dispersius crassiusque concinne punctato-reticulatis; pronoto sat longo, capite tamen breviore, transverse-rectangulo, antice in medio non impresso, metanoto parum gibbo-convexo, dentibus postico-lateralibus validis, acutis, postice recte truncatis; mesopleuris crasse sculptis, subtus inermibus; abdominis segmentis dorsalibus: primo basi utrinque impresso, subtus lævi ac violascenti, superne dense crassius cribrato-punctato, 2—3 basi violascentibus, secundo sat dense fortius concinne punctato, convexo, carinula mediana nulla, angulis postico-lateralibus recte truncatis, tertio parum depresso-convexo, serie-anteapicali nulla, secundo parum subtilius rugosiuscule punctato, apicem versus fortiter angustato, lateribus fere rectis obliquis, parte basali tenuiter albido-pellucidis, quadridentatis, dentibus in arcum dispositis sat magnis, externis acutis, intermediis acute-triangularibus, emarginaturis: centrali externis latiore subtriangulari, externis profundius arcuatis, lateribus subtus ante dentem externum leniter sinuatis; ventre aurato-viridi, femoribus et tibiis tarsorumque articulo primo superne læte-viridibus, his articulis reliquis rufescentibus; alis parum fumato-hyalinis, parte apicali magis hyalinis, venis fuscis, cellula radiali lanceolata valde incompleta, apice late aperta. — ♀; long 7 mm.

Abdominis segmento dorsali tertio serie-anteapicali nulla: specierum *Chrys. punctatissima* SPIN. et *Montezuma* CAM. socia; sed multo minor, magis æneo-viridis, abdominis segmento dorsali tertio apicem versus fortiter angustato, dentibus in arcum dispositis, lateribus parte basali anguste albido-pellucidis, iam satis distincta.

Patria: *Brasilia* (Para, 6/17—99, a Clar. Dom. A. DUCKE detecta mihi-que benevole donata (Mus. Hung. et Coll. DUCKEI).

### 6. *Chrysis* (Tetrachrysis) *Duckei*.

Magna, elongata, sat robusta, olivascenti æneo-viridis, parce fusco-alboque pilosa; vertice, collo, alarum tegulis, thorace abdomineque supra in locis certis parum violascentibus; facie tota fronteque viridi-auratis; cavitate faciali subangusta, profunda, dense punctato-coriacea argenteo-sericeoque pilosa, medio longitudinaliter anguste canaliculata, superne minus distinete crenulatim marginata; antennis crassiusculis, sat longis, fuscis, cano-puberulis, scapo læte-viridi, articulis flagelli 1—2 supra viridi-auratis, huius secundo longitudine mediocri, 3—4 simul sumptis parum breviore, genis brevibus, articulo antennarum secundo paulo longioribus; vertice circa stemmata macula, pronoti medio abdominisque segmentis dorsalibus primo secundoque fascia minus distincta nigro-æneis nigro-cupreoque violascentibus; pronoto brevi, transverso-rectangulo, convexo, antice in medio non impresso; postscutello in medio carinula brevi elevata arcuata-que instructo (sicut in *Chrys. carina* BRULLÉ, sed carinula magis elevata); metanoti dentibus postico-lateralibus validis, subacutis, divaricatis, curvatis, postice truncatis; vertice thoracisque dorso crasse profundeque punctato-reticulatis, mesopleuris viridibus, similiter sculptis, subtus apice obtuse-denticulatis, medio parum sinuatis; abdominis segmentis dorsalibus: primo basi subtus utrinque profunde impresso, late lævi ac polito, superne dense fortiter, secundo densius subtiliusque cribrato-punctatis parumque rugosiusculis, segmentis omnibus carinula mediana nigro-ænea instructis, quarum prima abbreviata subtilissime punctulata, secunda lata sublævi, huius angulis postico-lateralibus brevibus subacutis; segmento tertio subtilius minus profunde sat sparsim punctato, apicem versus parum angustato, paulo post medium per aream sat latam arcuatam, lævem ac politam nigro-æneam, in duas quasi partes diviso humiliori, serie-anteapicali nulla, quadridentato, dentibus in arcum dispositis, magnis, irregularibus, externis duobus acutis, intermediis late-triangularibus apice acutis, emarginaturis fere æquilatis, externis arcuatis, profundis, centrali basi angusta, arcuata, ante medium subangulata et inde remote recte-truncata, lateribus in medio leniter et ante dentem externum fortius sinuatis, dentibus his a margine laterali parum remotis; ventre viridi-aurato, segmento secundo basi utrinque nigro-maculato; femoribus ac tibiis tarsorumque articulo primo supra læte-viridibus, his articulis reliquis fuscis; alis sor-dide-hyalinis, apice nonnihil dilutioribus, venis fuscis, cellula radiali lanceolata incompleta apice sat late aperta. — ♂; long. 10 mm.

Serie-anteapicali nulla postscutelloque carinulato, magnitudine item et nonnunquam etiam colore ex parte : *Chrys. punctatissimae* Spin. pariter socia, ad eandemque subsectionem pertinens; sed abdominis segmento dorsali tertio area insigni lata arcuata lævi nigro-ænea humili dentibusque aliter constructis, bene distincta.

Patria : *Brasilia* (Para<sup>26/4</sup>—99, pariter a præclaro hymenopterologo A. DUCKE detecta et in eius honorem denominata (Mus. Hung. et Coll. DUCKEI).

### 7. *Chrysis* (Pentachrysis) *bombycida*.

Magna, elongata, sat robusta, parce longius cinereo-alboque pilosa; læte æneo-viridis, capite supra, pronoto et mesonoto antice viridi-subauratis; macula mediana subtriangulari verticis usque ad stemma anticum ducta et mesonoti lobo medio nigro-violaceis; abdominis segmento dorsali tertio violascenti-cyaneo; cavitate faciali sat lata minus profunda, viridi-cyanea, dense punctato-coriacea, medio anguste longitudinaliter canaliculata et parcius argenteo-pilosa, superne indistincte marginata seu potius crenulata; antennis minus longis, crassis, fuscis, cano-puberulis, scapo toto et articulis duobus primis flagelli supra viridi-cyaneis in femina, viridi-subauratis in maribus, flagelli articulo secundo longo, 3—4 simul sumptis longiore, articulis reliquis brevibus; genis longitudine mediocribus, articulo secundo antennarum vix longioribus; pronoto proportionaliter brevi, transverse rectangulo, antice in medio vix impresso; postscutello mucronato, mucrone planato triangulari sat valido, apice subacuto; metanoti dentibus postico-lateralibus validis, apice acuto, postice ante apicem parum sinuatis; vertice thoracisque dorso crasse minus dense punctato-reticulatis, mesopleuris fere similiter sculptis inermibus; abdominis segmentis dorsalibus: primo basi vix impresso, secundo tertioque convexis, illo carinula mediana nulla, angulis postico-lateralibus vix denticulatis, hoc supra seriem punctorum indistinctam lenissime calloso, quinquedentato, dentibus sat magnis spinoideis in arcum levem dispositis, centrali secundariis longissimis multo breviore magisque acuto, externis minutis subtriangularibus, emarginaturis duabus centralibus bene arcuatis æqualibus, externis fere dimidio latioribus minusque arcuatis; segmento hoc tertio apicem versus leniter angustato, dentibus a margine laterali parum remotis et ante dentem externum lenissime sinuato; segmentis duobus primis sat dense ac profunde, sed minus crasse, tertio parum subrugoso-punctatis; ventre viridi et violascenti-cyaneo variegato, segmento basi utrinque in medio nigro-æneo maculato; alis superioribus fumato-hyalinis, apicem versus nonnihil dilutioribus, venis fuscis, cellula radiali triangulariter lanceolata, apice sat late aperta. — ♂ ♀ ; long. 10 mm.

Cum *Chryside Shanghaiensi* Sm. similem agens vitam : parasiticam in uno *Bombyce* adhuc indeterminato, secundum observationem Clarissimi Domini Dr<sup>is</sup> H. BRAUNS, multum habet similitudinis etiam colore, postscutello formaque anali ; sed minor et non tam robusta, postscutelli mucrone non tam valido, sculptura subtiliore et segmenti analis dentibus multo brevioribus spinoideis, bene distincta. — De cetero *Chrysidis spinae* BRULLÉ proxima ; sed magis viridis, viridique subaurata, antennis brevioribus, non tam robustis, articulis intermediis minus dilatatis, genis quoque brevioribus, fronte angustiore, punctatura subtiliore, mucrone scutelli minus elevato, apice non tam acuto, abdominis segmento dorsali tertio dentibus parum longioribus, magis acutis, centrali minore, alis quoque parum dilutioribus, optime distinguenda.

Incunabulum seu folliculus (Cocon) quoque eius multum habet similitudinis cum incunabulo *Bombycis* nutricis : *Monemae flavescens* WALK. *Chrysidis Shanghaiensis* Sm. ; ea tamen differentia, quod incunabulum coloris cretacei, nucis avellanæ magnitudinis formæque, non tam regulariter sparsimque fusco-strigatum, sed strigis irregularibus tenuibus confusis obsitum est.

Patria : *Africa meridionalis* (Bothaville, Orange Fr. St. <sup>20</sup>/<sub>2</sub>—99), ab eximio hymenopterologo Dr<sup>e</sup> H. BRAUNS detecta mihi in tribus exemplaribus benevole donata (Mus. Hung. et Coll. BRAUNII).

### 8. *Chrysis* (Pentachrysis) *euchroma*.

Submagna, elongata, sat robusta, parce, sed longius cinereo-alboque pilosa ; capite, thorace abdominalisque segmento dorsali tertio viridi-cyaneis, duobus primis vero igneo-auratis, basi viridibus ; cavitate faciali sat lata ac profunda, dense punctato-coriacea argenteo-sericeoque pilosa, superne crenulata, distinete non marginata nec areata ; antennis longis, fuscis, cano-puberulis, articulis duobus primis viridi-subauratis, tertio proportionaliter brevi, quarto quintoque simul sumptis breviore, flagelli articulis 2—6 fortiter incrassatis, apicem versus valde attenuatis, articulis duobus ultimis tenuibus ; oculis magnis, ovalibus, valde exsertis ; genis longis, antennarum articulo tertio longioribus ; pronoto haud longo, transverso-rectangulo, antice in medio non impresso, postscutello gibbo-conico, metanoti dentibus postico-lateralibus sat validis, subacutis, postice modice sinuatis ; vertice circa ocellos, mesonoti lobo medio antice postscutelloque nigro-violaceis ; vertice pronotoque subtilius, parte reliqua thoracis parum fortius dense minus crasse punctato-reticulatis ; abdominis segmentis dor salibus : duobus primis concinne sat dense fortius, parum rugosiuscule cibrato-punctatis, secundo carinula mediana non bene distincta, angulis

postico-lateralibus subacutis, tertio dense parum subtilius rugoso-punctato, basi convexo, supra seriem calloso, foveolis sat magnis orbiculatis, circiter 10, profunde immersis, margine apicali brevi, quinquedentato, dentibus a margine laterali medio parum sinuato longe remotis et fere in lineam rectam transversam dispositis magnis, acute-triangularibus, intermediis tribus fere æquilongis, externis duobus minoribus, emarginaturis circiter æquilatis, profunde arcuatis; segmentis ventralibus viridi-auratis, segmento secundo basi in medio nigro-æneo maculato; pedibus viridi-subauratis, tarsis fuscis; alis sordide-hyalinis, venis fuscis, cellula radiali lanceolata completa, tegulis viridi-subauratis. — ♂; long. 9 mm.

Egregia hæc species: abdominis segmentis dorsalibus bicoloribus, iam primo intuitu facile cognoscenda, tantum *Chrysidis amoena* Ev. mari aliquantum similis.

Patria: *Littorale Hungaricum*, ad Zengg a Dom. PADEWIETH die 15. Julii 1901. detecta (Mus. Hung.).

### 9. *Chrysis* (Hexachrysis) *mesocyanea*.

Subparva, elongata, parallela, gracilis, parce cinereo-alboque pilosa; cyanea parumque violascens; facie, thoracis lateribus pedibusque viridi-cyaneis, abdominis segmentis dorsalibus lateribus late viridi-auratis, medio per totam longitudinem margineque apicali segmenti ultimi violascenti-cyaneis; cavitate faciali minus profunda, sat lata, medio obsoletius longitudinaliter canaliculata, utrinque dense minus concinne transverse striata argenteo-sericeoque pilosa, superne distinete arcuatim marginata, margine medio angulato; antennis crassiusculis, longis, fuscis, cano-puberulis, articulis duobus primis tertioque supra viridi-cyaneis, tertio longitudine mediocri, quarto parum breviore; pronoto sat longo, transverse rectangulo, antice in medio sat late longitudinaliter impresso, lateribus in medio sinuatis; postscutello gibbo-convexo crenulatoque; metanoti dentibus postico-lateralibus sat magnis acutis, postice parum sinuatis; mesopleuris transverse foveolatis; vertice, pro- et mesonoto densius parumque subtilius, scutello postscutelloque modice dispersius crassiusque punctato-reticulatis; abdominis segmentis dorsalibus: primo disco sat crasse profundeque fere cribrato-punctato, interstitiisque punctulatis; secundo rugosiuscule dense minus crasse, tertio magis regulariter punctulatis, illo carinula mediana minus distincta, angulis postico-lateralibus rectis, hoc basi transverse leviter impresso, apicem versus leniter angustato, supra seriem sat fortiter incrasato, ipsa serie foveolis maiusculis orbiculatis, circiter 8 bene distinctis, margine apicali longiusculo, dense punctulato, sexdentato, dentibus in arcum levem dispositis, intermediis quattuor proportionaliter longis ac vali-

dis, acute-triangularibus, fere æquilongis, centralibus tamen modice longioribus, quam secundariis, externis duobus brevioribus minusve acutis, marginibus lateralibus fere rectis, lenissime tantum sinuatis; emarginaturis tribus intermediis profunde arcuatis, fere æquilatis, externis duabus latius, sed non tam profunde arcuatis; ventre subaurato-viridi, segmento secundo basi nigro-maculato, tarsis fuscis; alis subfumato-hyalinis, parum violascentibus, venis fuscis, cellula radiali lanceolata subcompleta, apice parum aperta, tegulis violascentibus. — ♀; long.  $6\frac{1}{2}$  mm.

Species: de cavitate faciali, colore abdominis dentibusque analibus facile cognoscitur.

Patria: *Madagascar* (Mus. Hung.).

#### 10. *Chrysis* (Hexachrysis) *oceania*.

Submagna, elongata, minus robusta, parallelia, parcus cinereo-alboque pilosa; cyaneo-viridis, abdominis segmentis dorsalibus magis cyanescens-tibus; cavitate faciali viridi, dense punctato-coriacea parcusque argenteo-sericeo pilosa; fronte area reniformi transversa non satis distincta, margine supero medio triangulariter emarginata; antennis crassiusculis, longis, nigris, cano-puberulis, scapo et articulo primo flagelli superne viridibus, huius secundo longo, primo fere dimidio adhuc longiore; genis brevibus antennarum articulo secundo æquilongis; vertice thoracisque dorso fere æquilateriter dense crassius punctato-reticulatis; pronoto mesonotoque longis, illo transverse-rectangulo, antice in medium parum impresso, lateribus in medio sinuatis; postscutello parum gibbo-convexo crenulatoque, dentibus postico-lateralibus validis, late obtusis; mesopleuris sat crasse punctato-reticulatis, canalicula longitudinali areaque inferiori indistinctis; abdominis segmentis dorsalibus; primo basi superne parum impresso, minus dense cribrato-punctato interstitiisque subtiliter punctulatis, secundo punctatura simili parum subtiliore, sed interstitiis haud punctulatis, carinula mediana minus distincta, angulis postico-lateralibus denticulatim productis, tertio apicem versus leniter angustato, densius subtiliusque subrugoso-punctato, convexo, supra seriem leniter incrassato, foveolis sat profunde immersis, circiter 10 mediocribus, rotundatis, modice confluentibus, per carinulam medianam interruptis, margine apicali sat longo, dense rugosiuscule punctulato, violascenti-cyaneo, sexdentato, dentibus in arcum dispositis, intermediis quattuor sat longis, acute-triangularibus, subæqualibus, externis duabus brevioribus, sub obtuse-triangularibus, emarginaturis: intermediis sat profunde arcuatis subæqualibus, externis duabus minus profunde arcuatis, sed parum latioribus, lateribus subrectis in medio parum sinuatis: ventre femoribus item et tibiis metatarsisque supra viridibus, illo segmento

secundo basi nigro-fasciato, his tarsorum articulis reliquis fuscis; alis subfumato-hyalinis parumque violascentibus, nervis fuscis, cellula radiali lanceolata subcompleta, apice parum tantum aperta, tegulis viridibus. — ♀; long. 10 mm.

*Chrysidis triangulatae* Mocs. Term. Füz. XXII. 1899, p. 491, n. 10. ♀ similis et affinis; sed maior, pro-mesonotoque evidenter multo longioribus, punctatura abdominis fortiore, dentibus analibus parum brevioribus, externis duobus subobtusis non vero acutis, alis multo dilutioribus, speciem distinquentem esse censeo.

Patria: *Insulae Salomonis* (Shortland), ibidem a C. RIBBE detecta (Mus. Hung.).

**Cleptes elegans** Mocs., ZICHY Ázsiai Utaz. II. Hymen. pag. 158. n. 293. ♀. (1901).

Mediocris, elongatus, minus robustus, totus parcus albido pilosus; capite lāete viridi-æneo, cupreo- et parum orichalceo-micanti, facie convexa, sat sparsim fortius punctata, medio canaliculata, canalicula tenui usque ad stemma anticum producta; antennarum scapo flagellique articulis 1—4 rufo-testaceis, scapo intus parum infuscato, reliquis fuscis, cano-puberulis; prothorace, alarum tegulis, pedibus omnibus cum trochanteribus coxarumque apice, abdominis item segmentis dorsalibus duobus primis totis tertiique parte basali supra subtusque rufo-testaceis, tertii parte apicali supra nigra, lateribus et quarto toto lāete violascenti-cyaneis, ventralibus nigro-piceis, tarsorum articulis ultimis parum infuscatis; pronoto convexo, sat dense minus fortiter punctato, intra marginem posticum serie punctorum transversa nulla; mesonoto cum scutello mesopleurisque lāete viridi-æneis parumque orichalceo-micantibus, illis duobus valde sparsim punctatis, his autem dense punctulatis; postscutello viridi-æneo, metanoto violascenti-cyaneo, irregulariter crassius rugoso-subreticulato, dentibus postico-laterilibus minutis, acutis; abdominis segmentis dorsalibus nitidis, primo lāevi ac polito, secundo valde sparsim, tertio densius subtiliter punctulatis, quarto supra subtusque fortius densiusque punctato; alis sordide-hyalinis, venis fuscis, alis anticis apice abdominis multo brevioribus. — ♀; long. 6 mm.

Feminæ *Cleptis nitiduli* FABR. similis et affinis; sed parum maior, totus parcus albido-pilosus, capite, mesonoto cum scutello et mesopleuris aliter coloratis, facie fortius punctata, antennarum scapo, alarum tegulis

pedibusque rufo-testaceis, metanoti dentibus postico-lateralibus brevioribus minus validis, abdominis segmentis dorsalibus 2—3 multo dispersius subtiliter punctulatis, tertii lateribus quartoque lāete violascenti-cyaneis, alis parum dilutioribus, species bene distincta.

Patria : *Russia orientalis* (Kazan), a collega nostro E. Csíki detectus (Mus. Hung.).

---